


Na forma grandi a tene 'Honor to Connor Steelband Extravaganza'



ORANJESTAD (AAN): Diabierna anochi Sweet Pan Music Productions a presenta 'Honor to Connor Steelband Extravaganza' dilanti di Charlie's Bar na San Nicolas. Un anochi unda a comemora y honra Pionero den musica Steel Pan y Fundador di The Aruba Invaders Steel Orchestra, Sr. Edgar Connor riba su fecha natal 18 di Januari. Si Sr. Edgar Connor tabata na bida, lo el a cumpli 80 aña. Gregory Richardson tabata e Maestro di Ceremonia pa e evento y pa e ultimo parti Ruben Garcia a continua como MC y a presenta su programa 'Riba Bou' live via canal 22. E anochi tabata uno sumamento exitoso cu a inicia cu entrada di famia Connor na pia tocando pa mustra e public con antes Sr. Edgar Connor y tur e musiconan di steelband tabata cana den paradanan di carnaval den e solo cayente cu nan Steel Pan rond di nan neck y otro musiconan cu campana y hop den man. Gregory Richardson a conta un poco di e historia di Steel Pan y tambe a declama un poesia dedica na Sr. Edgar Connor. E studiantenan di Aruba Panman Foundation cu ta haya les na School di Arte a subi escenario pa prome biaha y a duna un bunita presentacion.

DJ Caletto a presenta su mix di musica di Steel Pan di antes. Marver Guedeza a bin cu un seleccion di musica moderno alegre riba Steel Pan den combinacion cu e backing tracks.

Tabata tin presentacion di The Boyz Pan Experience y tambe di Quiver Quips Steel Orchestra cu porcierto a reuni despues di hopi aña pa e anochi special aki. A canta Happy Birthday, a cor-



ta bolo y a parti cupcakes den publico. Y ta na e momento aki cu Señora Gloria Thomas Connor a subi escenario ta baila y a toca e hop un rato, y hunto cu su sobrina Señora Diana Clark cu tambe a haci aña a corta e bolo.

Señora Gloria a haya e prome pida bolo cu el a share cu su yiu-nan Nico y Lee ariba escenario.


Manera DIARIO a mustra, Ruben Garcia a presenta su programa 'Riba Bou' live via canal 22 y a presenta e ultimo banda pa e anochi, The Invaders cu a worde compaña pa un Carnival Costume Show presenta pa Carnaruba y tambe pa e cantante Might Rusty cu a presenta algun hits di añanan anterior incluyendo un cancion dedica na Sr. Edgar Connor, 'Mr. Man' (on he first pan) componi pa Antoni Gario 25 aña pasa.

Minister di Cultura Señora Xiomara Maduro tambe tabata presente y a duna un bunita

speech. E anochi tabata tin su sorpresa cu ne, unda a presenta e T-shirt pa 18 di maart dia di Aruba pa Marietje Printing.

Marietje a keda encanta cu e diseño di e poster di evento cu ta un Steel Pan cu Sr. Edgar Connor a regala Sr. Charles Brouns Sr. y pinta pa Charles Brouns Jr. Y asina a pidi e rumanan Connor pa uza e diseño di Steel Pan cu un adaptacion cu e bandera di Aruba su tras pa presenta esaki como e logo official pa e T-shirt di 18 di maart dia di Aruba y Brinda honor na Sr. Edgar Connor cu a contribui enormemente na nos carnaval, na nos cultura.

Marietje Printing a regala famia Connor un canvas cu e logo official. Famia Connor a ricibi nan regalo di Minister Xiomara Maduro y MC Ruben Garcia y a keda sumamente contento y orguyoso di mira e Steel Pan como e logo official pa e T-shirt di 18 di Maart dia di Aruba.



Computer Lessons

www.DataTechAruba.com
Tel. 5934494-5880950